

# YOS XUAS

Yos Xuas, Zaj 1 thiab 3

**Tswv Ntuj hais rau Yos Xuas tias  
txog lub caij mus txeeb Kas Nas  
Has teb lawm. 1 : 1 - 5.**

**1** 1 Thaum HUAB TAIS tus tub txib Mais Xes tuag tas lawm, HUAB TAIS hu Yos Xuas uas yog Nuv tus tub thiab yog tus pab Mais Xes. HUAB TAIS hais rau Yos Xuas tias :  
2 "Kuv tus tub txib Mais Xes tuag lawm. Nyem no, koj sawv mas ! Koj hla tus dej Yos Las Das ntawd mas ! Koj yuav nrog haiiv neeg no mus lawm hauv lub teb chaws uas kuv muab rau tsoom His Xas Lais. 3 Thaj chaw twg tsuav yog nej lub qab xib taws tau mus tsuj txog mas kuv yuav muab rau nej, raws li kuv tau hais rau Mais Xes.

4 Txij teb chaws suab puam thiab Lis Npaas teb mus rau tus dej loj Aws Fas Tes mus txog lub hiav txwv loj nyob rov sab hnub poob, mas yuav yog nej teb chaws huv si. 5 Tas koj sim neej yuav tsis muaj ib tug neeg tiv tau koj, vim kuv yuav nrog koj ib yam li kuv tau nrog Mais Xes. Kuv yuav tsis tso koj pov tseg ib zaug, kuv yuav tsis ncaim ntawm koj."

**Tsoom His Xas Lais hla tus dej Yos  
Las Das. 3 : 7 + 10a - 11 + 13 - 17.**

**3** 7 HUAB TAIS hais rau Yos Xuas tias :

"Hnub no, kuv yuav ua kom koj loj tuaj rau tas tsoom His Xas Lais pom, kom lawv paub tias kuv yuav nrog koj ib yam li kuv nrog Mais Xes. Koj yuav ceeb toom rau cov Leej Choj kwv lub Xab Cog Lus li no : thaum nej mus txog ntawm ntug dej Yos Las Das lawm, nej yuav mus

nyob hauv nruab nrab tus dej." Ces Yos Xuas hais rau cov His Xas Lais tias :

"Nej txav los mloog HUAB TAIS Tswv Ntuj cov lus !" 10 Yos Xuas hais tias :

"Nej yuav pom tias Tswv Ntuj yog ib tug Tswv Ntuj muaj txoj sia nyob hauv nruab nrab nej, vim nej yuav pom ib yam zoo li no : 11 HUAB TAIS uas yog tus Tswv kav tas lub ntiaj teb, nws lub Xab Cog Lus yuav hla tus dej Yos Las Das ua nej ntej. 13 Thaum cov Leej Choj kwv HUAB TAIS lub Xab Cog Lus mus tsuj cov dej Yos Las Das, mas tam sim ntawd dej yuav tsis ntws ntxiv. Cov dej yuav nres ua ib pawg nyob pem hauv dej !

14 Thaum tsoom pej xeem His Xas Lais sawv kev mus hla tus dej Yos Las Das, mas cov Leej Choj kwv lub Xab Cog Lus mus ua sawv daws ntej.

15 Thaum ntawd yog lub caij sau nplej, tus dej Yos Las Das phwj dhau ob sab ntug. 16 Cov kwv lub Xab Cog Lus nyuam qhuav txog ntawm ntug dej Yos Las Das xwb, cov Leej Choj ko taw nyuam qhuav tsuj cov dej, ces cov dej ntws pem hauv los theem kiag, thiab dej teev kiag ua ob lub pas dej siab siab nyob ob sab, txij As Das mus txog lub yeej Xas Taas. Hos cov dej nram hav ntws mus txog lub hiav txwv daw ntsev hu ua hiav txwv As Las Npas. Tsoom pej xeem hla dej ncaj ntawm lub tsheej Yes Lis Kos.

17 Cov Leej Choj uas lawv kwv lub Xab Cog Lus, lawv sawv ntsug nyob hauv nruab nrab tus dej Yos Las Das, lawv ko taw qhuav tsis ntub dej, thiab tas tsoom His Xas Lais kuj hla dej, ko taw tsis ntub dej li. Tas haiv His Xas Lais hla dej zoo li ntawd.

**Cov His Xas Lais ua lub Ntees Hla.  
Lawv noj lawv cov qoob loo.  
5 : 9 - 12.**

**5** 9 HUAB TAIS hais rau Yos Xuas tias :

"Hnub no, kuv hle nej lub koob meej phem nyob Hais Nkws Tos teb pov tseg." Ces qhov chaw ntawd thiaj hu ua Ntsis Nkas los txog tav no.

10 Cov His Xas Lais tsa tsev tsam phooj nyob ntawm Ntsis Nkas. Thaum txog hnub tim kaum plaub tsaus ntuj lawv thiaj ua lub Ntees Hla. Yog nyob hauv lub tiaj Yes Lis Kos. 11 Ua lub Ntees Hla tas, tag kis lawv noj cov txhiam xws uas lawv cog nyob hauv lub teb chaws. Lawv noj cov mov tsis xyaw poov xab thiab cov noob nplej kib.

12 Tsis muaj cov mov mas nas lawm, vim lawv twb tau cov mov hauv lub teb chaws noj lawm. Cov His Xas Lais tsis muaj cov mov mas nas lawm ces txij xyoo ntawd los lawv noj cov txhiam xws nyob hauv lub teb chaws Kas Nas Has.

**Lawv txeeb tau Yes Lis Kos.  
6 : 1 - 7 + 10 + 14 - 16 + 20 - 21.**

**6** 1 Cov neeg nyob Yes Lis Kos lawv thaiv lub tsheej zoo kawg kom cov His Xas Lais txeeb tsis tau. Tsis muaj neeg tawm thiab kuj tsis muaj neeg chaws mus hauv li.

2 HUAB TAIS hais rau Yos Xuas tias : "Koj saib, kuv muab lub tsheej Yes Lis Kos thiab nws tus vaj tso rau hauv koj txhais tes. 3 Nej cov ntaus rog uas muaj lub siab tawv, nej mus ncig ib lwm kom thoob lub tsheej. Nej yuav ua li ntawd rau hnub sib law.

4 Xya tus Leej Choj yuav nqa xya lub hom ua lub Xab Cog Lus ntej. Hnub xya,

nej yuav mus ncig lub tsheej xya lwm. Hnub ntawd cov Leej Choj yuav tshuab hom ua ntej.

5 Thaum nej hnov suab hom nrov, tas tsoom sid sawv daws yuav qw ib tsaug loj loj xws li neeg ntaus tsam. Mas tam sim ntawd lub ntsa loog yuav vau. Ces tas sawv daws yuav nias tsam mus txeeb lub tsheej, nyias mus ncaj nraim ntawm nyias hauv ntej."

6 Ces Yos Xuas hu cov Leej Choj tuaj, nws hais rau lawv tias :

"Nej kwv lub Xab Cog Lus. Thiab xya tus Leej Choj yuav nqa xya lub raj kub tshis ua HUAS TAIS lub Xab Cog Lus ntej."

7 Yos Xuas hais rau tsoom sid tias :

"Nej mus ua ib ncig vij lub nroog."

10 Yos Xuas ceeb toom rau tsoom sid tias :

"Nej tsis txhob qw, tsis txhob pub kom luag tej hnov nej lub suab. Nej yuav tsis txhob hais ib los lus mus txog hnub kuv hais rau nej tias : 'Nej qw lub suab nias tsam !' Mas thaum ntawd nej yuav qw tiag."

14 Hnub ob, lawv ua ib ncig lub tsheej tas, lawv rov mus hauv yeej. Lawv ua li ntawd rau hnub sib law.

15 Hnub xya, lawv sawv ntxov ntxov mus ncig lub tsheej. Lawv ua xya lwm zoo li qhov qub. Kawg yog hnub ntawd xwb lawv thiaj ncig xya lwm. 16 Lwm xya, cov Leej Choj thiaj tshuab hom. Yos Xuas hais rau tsoom sid tias :

"Nej qw lub suab nias tsam ! Vim HUAB TAIS muab lub tsheej no rau nej lawm !"

20 Ces tsoom sid qw thiab suab hom nrov doog diaj. Thaum suab hom nrov, tsoom sid qw ib suab nias tsam nrov loj tas nrho ua lub ntsa loog vau hlo. Tam sim ntawd sawv daws nce mus pem lub tsheej, nyias mus ncaj nyias xub ntiag.

Lawv txeeb tau lub tsheej.

21 Lawv muab lub txim tsawm lub tsheej, lawv rhuav tas puas tsav yam nyob hauv lub tsheej. Txiv neej, poj niam, laus hluas, me nyuj, me yaj, me luj. Lawv xuas ntaj tua pov tseg tas tib si.

**Lawv txeeb tau lub tsheej Ais.**

**8 : 3 - 5 + 9 - 10 + 14 - 22.**

**8** 3 Yos Xuas npaj yuav coj cov tub rog tas huv tib si mus ntaus lub tsheej Ais. Nws xaiv peb caug txhiab leej yog cov txawj tshaj, nws kom lawv mus hmo ntuj.

4 Nws xub ceeb toom rau lawv tias : "Nej yuav muab siab rau ! Nej yuav mus nkaum nyob nram qab tsheej tos. Nej siv tom txwv ntaus lub nroog. Nej tsis txhob mus nyob deb heev. Nej mloog ntsoov mus li.

5 Kuv yuav nrog sawv daws txav mus kom txog lub tsheej. Ces thaum cov neeg nyob hauv Ais tawm tuaj ntaus peb mas peb yuav khiav."

9 Ces Yos Xuas tso lawv mus. Lawv thiaj mus nrhiav chaw nkaum nyob ntawm Ais xib fab, nyob hauv Ais thiab Npes Thes kis nruab nrab. Yos Xuas nrog tsoom sid pw ib hmos.

10 Tag kis nws sawv ntxov ntxov. Nws mus txheeb tsoom sid tib si, ces nws coj lawv nce mus pem Ais, nws nrog cov txwj laus His Xas Lais ua ntej.

14 Thaum tus vaj Ais pom tias cov His Xas Lais vij nws lub tsheej lawm, mas tus vaj tawm ceev ceev tuaj nrog lawv sib tua. Nws coj nws cov tub rog tuaj nyob ntawm phab toj ntsia ntsoov mus rau lub tiaj As Las Npas, nws tsis paub tias muaj ib pab His Xas Lais nkaum nyob nram qab tsheej.

15 Yos Xuas thiab tsoom His Xas Lais

cia tus vaj tuaj ntaus lawv. Lawv khiav taug txoj kev mus rau teb chaws suab puam.

16 Tas tsoom neeg nyob hauv lub tsheej tawm tuaj caum cov His Xas Lais, lawv qw ntsuag qees. Lawv caum Yos Xuas mus deb lub tsheej. 17 Tsis tshuav ib tug txiv neej nyob hauv Ais uas yuav tsis tuaj caum cov His Xas Lais. Lawv tuaj tas tib si thiab lawv cia lub rooj loog tsheej qhib tseg.

18 Ces HUAB TAIS hais rau Yos Xuas tias :

"Koj tsa rab hmuv nyob hauv koj txhais tes mus rau Ais, vim kuv yuav tso lub tsheej rau hauv koj tes." Yos Xuas tsa hlo rab hmuv nws tuav mus rau lub nroog. 19 Thaum nws xyab tes kiag, cov tub rog nkaum nram qab tsheej tawm plaws los, lawv khiav mus hauv lub tsheej thiab lawv zes taws tam sid rau lub tsheej.

20 Cov neeg Ais tig loo los saib, lawv pom pa taws twb ncho nto ntuj. Lawv tsis muaj ib tug yuav muaj lub zog khiav mus lawm ib qho li. Hos cov His Xas Lais uas lawv caum mus teb chaws suab puam tig loo rov los ntaus lawv.

21 Yos Xuas pom tias cov tub rog lawv xub mus nkaum lawv txeeb tau lub tsheej lawm, thiab nws pom pa taws ncho nto ntuj plaws, mas nws coj cov His Xas Lais tig loo rov los ntaus cov Ais.

22 Cov mus hlawv lub tsheej kuj tawm tuaj pab Yos Xuas lawv thiab. Ces cov Ais nyob hauv ob pab His Xas Lais kis nruab nrab. Cov His Xas Lais muab lawv tua tuag tas, tsis tshuav ib tug ciaj los ib tug dim khiav li.

**Nyob Nkas Npas Oos, lub hnub nres. 10 : 6 - 13.**

**10** 6 Cov Nkas Npas Oos xa lus mus

rau Yos Xuas nyob hauv lub yeej Zis  
Nkas tias :

"Koj tsis txhob tso koj cov tub txib pov  
tseg ! Koj tsuag tsuag tuaj cawm peb  
thiab tuaj pab peb, vim cov vaj As Mos  
uas nyob pem toj siab sib koom tuaj ntaus  
peb lawm."

7 Yos Xuas thiaj mus. Nws coj nws pab  
tub rog txawj tshaj tas tib si nrog nws  
mus. 8 HUAB TAIS hais rau Yos Xuas  
tias :

"Koj tsis txhob ntshai lawv ! Kuv muab  
lawv los ua neeg zwm rau koj tas tib si.  
Tsis muaj ib tug yuav tiv tau koj."

9 Yos Xuas mus ib hmos kev, nws mus  
ntsib cov As Mos, cov As Mos tsis nco  
qab ceev faj dab ts.

10 Yog HUAB TAIS ua kom lawv swb  
His Xas Lais nyob Nkas Npas Oos. Ces  
lawv poob tsam loj kawg. Yos Xuas  
tseem caum lawv mus raws phab toj Npes  
Hos Loos, nws ntaus lawv mus txog As  
Xes Kas thiab txog Mas Kes Das.

11 Thaum lawv tab tom khiav nqes phab  
toj Npes Hos Loos, HUAB TAIS tseem  
tso ib co lawg loj loj poob saum ntuj los  
ntaus lawv mus txog As Xes Kes. Cov  
raug lawg ntaus tuag coob dua cov raug  
His Xas Lais tej ntaj tua tuag.

12 Hnub ntawd HUAB TAIS muab lub  
teb chaws As Mos rau cov His Xas Lais  
kav. Hnub ntawd Yos Xuas tsa suab hais  
rau HUAB TAIS tias :

"Lub hnub, koj los tus ncaj saum Nkas  
Npas Oos mas ! Lub hli, koj los theem  
ncaj saum lub hav As Yas Loos mas !"

13 Ces lub hnub tus thiab lub hli kuj  
nres twj ywm saum ntuj mus txog thaum  
haiw His Xas Lais pauj rau lawv cov yeeb  
ncuab tas.

**Yos Xuas ntuas cov His Xas Lais  
nyob Xis Kes. 24 : 1 - 13.**

**24** 1 Yos Xuas hu tas nrho cov  
xeem His Xas Lais tuaj nyob Xis  
Kes. Nws hu cov txwj laus His

Xas Lais, cov nom tswv, cov txiav txim  
thiab cov thoob xwm ntawv tuaj sawv ua  
tej phiaj nyob ntawm Tswv Ntuj xub  
ntiag. 2 Ces Yos Xuas hais rau  
tsoom sid sawv daws tias :

"Tsoom His Xas Lais tus HUAB TAIS  
Tswv Ntuj hais li no :

Thaum ub, nej cov yawg koob nyob sab  
dej tid. Yog Tes Las uas nws yog Has  
Nplas Has thiab Nas Hos nkawd txiv.  
Thaud, lawv teev lwm cov dab. 3 Kuv  
tau hu Has Nplas Has thiab tau coj nws  
mus hla tas nrho cov teb chaws Kas Nas  
Has. Kuv tau pub kom nws muaj tub ki,  
muaj xeeb zeeb ntxwv huam vam.  
Kuv pub His Xas Has rau nws.

4 Kuv pub Yas Kos thiab Es Xas Ws rau  
His Xas Has. Kuv muab lub roob Xes Is  
rau Es Xas Ws yuav ua nws tug. Yas Kos  
thiab nws cov tub tsiv mus nram Hais  
Nkws Tos teb.

5 Ces kuv thiaj tau xa Mais Xes thiab As  
Loos nkawd tuaj thiab tau tso xwv txheej  
los raug Hais Nkws Tos teb. Kuv mam li  
pab kom nej tawm los.

6 Kuv coj nej cov yawg koob tawm los.  
Thaum lawv los txog ntawm lub Hiav  
Txwv, mas cov Hais Nkws Tos caij tsheb  
caij nees tuaj caum lawv txog ntawm lub  
Hiav Txwv Tauj. 7 Lawv hu txog  
HUAB TAIS, ces HUAB TAIS tso huab  
tuaj thaiv nej ntawm cov Hais Nkws Tos  
thiab nws tso dej hiav txwv nphau los  
nyab lawv. Nej qhov muag tau pom tej  
yam kuv ua nyob Hais Nkws Tos teb.  
Nej tau los nyob ntev xyoo nyob hauv teb  
chaws suab puam.

8 Ces kuv tau coj nej los nyob hauv lub  
teb chaws As Mos uas nyob sab dej Yos  
Las Das tim ub. Lawv sawv ua rog ntaus

nej, tab sis kuv muab lawv rau hauv nej tes, ces nej tau lawv lub teb chaws los ua nej lub cuab tam, vim kuv tau ua kom lawv ploj ntshis nyob ntawm nej xub ntiag.

9 Tus vaj Muas kuj tau sawv ua rog rau His Xas Lais. Nws tso neeg mus hu Npas Las Has tuaj tsawm nej. 10 Tab sis kuv tsis kam mloog Npas Las Has, ces Npas Las Has tseem tau foom lus zoo txog nej thiab kuv tau cawm nej dim ntawm nws txhais tes.

11 Thaum nej hla dej Yos Las Das los txog Yes Lis Kos, cov neeg kav Yes Lis Kos ua rog rau nej. Cov As Mos, cov Pes Lis Xis, cov Kas Nas Has, cov His Tis, cov Zis Nkas Sis, cov His Vis thiab cov Zes Npws kuj sawv ntaus nej, tab sis kuv tau muab lawv los zwm rau nej huv tib si.

12 Kuv tau tso ib co nkawj ua nej ntej mus caum ob tug vaj As Mos. Ces nej tsis tau siv ntaj los siv hnneev.

13 Lub teb chaws kuv muab rau nej mas tsis yog nej tau khwv txhim. Cov tsheet uas nej mus nyob hauv mas tsis yog nej tau khwv ua. Cov txiv cawv thiab txiv roj uas niaj hnub nej noj mas tsis yog nej tau khwv cog."

### **Cov His Xas Lais cog Ius nyob Xis Kes. 24 : 14 - 29.**

14 Nyob Xis Kes, Yos Xuas hais rau cov His Xas Lais tias :

"Tsoom His Xas Lais, nyem no, nej yuav hwm thiab tsob hwb HUAB TAIS raws txoj kev ntshiab kev ncaj. Cov dab uas thaum ub nej cov yawg koob teev nyob ntawm tus dej sab tid thiab nyob Hais Nkws Tos teb mas nej muab tso pov tseg, nej los tsob hwb HUAB TAIS.

15 Tab sis yog nej tsis zoo siab tsob hwb HUAB TAIS, mas nej cia li xaiv ib co

dab uas nej xav tsob hwb. Nej puas xaiv nej cov yawg koob thaud cov dab los puas xaiv cov As Mos cov dab, uas nyem no nej nyob hauv lawv teb chaws ? Ntawm kuv thiab kuv tsev neeg mas peb xav tsob hwb HUAB TAIS."

16 Ces tsoom sid teb tias :

"Peb tsis tso HUAB TAIS pov tseg mus teev lwm cov dab li !

17 Peb tus HUAB TAIS Tswv Ntuj tsis yog tus tau coj peb cov yawg koob thiab coj peb tawm hauv Hais Nkws Tos teb los lod ?

Nws cawm peb dim ntawm lub tsev ua qhev. Nws tau ua hwj huam loj rau peb qhov muag pom xyeem. Thaum peb mus kev thiab peb hla pej kum teb chaws, nws tau txuag peb.

18 Cov haiv neeg thiab cov As Mos uas lawv xub nyob teb chaws no, mas HUAB TAIS caum lawv khiav. Peb kuj yuav tsob hwb HUAB TAIS, vim nws yog peb tus Tswv Ntuj."

19 Ces Yos Xuas hais rau tsoom sid tias : "Nej yuav tsob hwb HUAB TAIS tsis tau, vim nws yog ib tug Tswv Ntuj ntshiab, nws yog ib tug Tswv Ntuj muaj khib, nws yuav tsis zam nej cov txhaum rau nej.

20 Yog nej tso HUAB TAIS pov tseg mus tsob hwb pej kum dab, mas HUAB TAIS kuj yuav hiam nej. Nws yog tus tau ua zoo rau nej, tab sis nws yuav ua kom nej ploj tas."

21 Tsoom sid teb rau Yos Xuas tias :

"Peb tsis xav teev dab. Tus peb xav tsob hwb yog HUAB TAIS."

22 Ces Yos Xuas hais rau tsoom sid tias : "Nej rov ua tim khawv zeem tias nej tau xaiv txoj kev tsob hwb HUAB TAIS."

Lawv teb tias :

"Peb ua tim khawv zeem li ntawd !"

23 Yos Xuas hais tias :

"Ua li mas nej ntiab pej kum neeg cov

dab uas nyob hauv nruab nrab nej. Nej tig los cuag His Xas Lais tus HUAB TAIS Tswv Ntuj."

24 Tsoom sid teb rau Yos Xuas tias : "Peb tus HUAB TAIS Tswv Ntuj yog tus peb xav tsob hwb. Peb xav mloog nws lub suab qhia peb !"

25 Hnub ntawd Yos Xuas nrog tsoom sid cog lus. Nws tsa ib co txhooj thiab ib

txog cai rau lawv coj nyob Xis Kes.

26 Yos Xuas sau cov lus ntawd tseg rau hauv phau ntawv hais txog Tswv Ntuj Txoj Cai. Nws ua li ntawd tas ces nws muab ib lub pob zeb loj los tsa nyob hauv

tsob qab ntoo uas nyob hauv HUAB TAIS lub loog.

27 Yos Xuas hais rau tsoom sid tias : "Nej ntsia, lub pob zeb no ua tim khawv txog peb vim nws tau hnov cov lus uas HUAB TAIS hais rau peb tas tib si. Lub pob zeb no yuav ua tim khawv txiav txim rau peb, vim nws tau hnov cov lus uas HUAB TAIS hais rau peb."

28 Ces Yos Xuas tso sawv daws nyias rov mus nyias tsev.

29 Thaum tej xwm no tshwm sim tuaj tas lawm, mas Yos Xuas uas yog Nuv tus tub thiaj tuag, nws muaj ib puas kaum xyoo.

